

Høyringsvar frå Askvoll sokneråd til ny kyrkjeordning.

Vi viser til kunngjorte høyring om ny kyrkjeordning frå Kyrkjerådet med høyringsfrist 15. desember 2018. Under følgjer Askvoll sokneråd (med fellelrådsfunksjon) sitt høyringsvar.

Innleidningsvis takkar vi for høvet til å gje uttale før ny kyrkjeordning vert fastsett.

Som ei generell innvending til høyringa, spør vi oss om dette er rett tidspunkt for å gjennomføre ei høyring, då ein avventar lovfesta rammer for trus- og livssynssamfunna, som vil verte regulerte i ny lov om trus- og livssynssamfunn, som mellom anna vil setje dei økonomiske rammene for Den norske kyrkja og vonleg sikre soknet sitt sjølvstende (som eige rettssubjekt) og såleis vert gitt rettsleg handlingsrom for å halde fram å ivareta arbeidsgivaransvar.

Vi stiller oss positive til at det på dette stadiet i prosessen med etablering av ny kyrkjeordning ikkje vert lagt fram vesentlege endringsforslag i forhold til gjeldande ordning (kyrkjelov), men at slike realitetsendringar vert eit neste steg i prosessen om ny kyrkjeordning.

Vi er særleg positive til at oppgåver og ansvarsområde for soknet sine organ i hovusak vert vidareførte frå gjeldande kyrkjelov.

Kommentarar til ordningsforslaget.

Til kapittel 1 (§§ 1-8):

Vi stiller oss positive til at det vert etablert grunnlagsbestemmelser, eller eit læregrunnlag for Den norske kyrkja, som krev 2/3 fleirtal i Kyrkjemøtet for å kunne endre.

Vi saknar likevel ei regelfesta formålsbestemmelse for Den norske kyrkja, som vert teke inn i ein ny § 1 som tilsvarar § 1 dagens kyrkjelov, og vi føreslær:

§ 1 Ordningens formål.

Formålet med ordningen er å legge forholdene til rette for et aktivt engasjement og en stadig fornyelse i den evangelisk-lutherske folkekirke i Norge.

Til § 5 Om tenestefellesskapet.

Vi føreslær at denne paragrafen vert stroke. Slik forslaget står no, kan dette snarare svekke enn styrke tanken om eit tenestefellesskap av medarbeidarar. Eit skilje mellom ikkje-vigsla og vigsla medarbeidarar, i form av opplistinga, er kunstig med utgangspunkt i tanken om eit tenestefellesskap.

Til § 6 Organisering av Den norske kyrkja.

Vi ønskjer å sikre at styring og leiing av Den norske kyrkja skjer med utgangspunkt i demokratiske prinsipp på alle nivå. Med forslaget til § 6, 3. ledd vil dette kunne verte svekka. Å sikre medverknad frå prestelinja, kan verte regulert slik:

§ 6 tredje ledd: Styring og ledelse av Den norske kirke bygger på demokratiske prinsipper og skal være forankret i demokratisk valgte organ på alle nivåer.

Prestetjenesten er representert i de valgte styringsorganer etter nærmere regler fastsatt av Kirkemøtet.

Til kapittel 2 (§§ 9-14):

Til § 9, 1. ledd.

Denne bestemmelsen synest noko uklar.

Vi er usikre på kva som ligg i nemninga «administrativ ramme». Her bør soknet sitt sjølvstende som grunnleggjande eining komme tydelegare fram.

Til § 11 fjerde ledd.

Vi føreslær at «**prest**» vert erstatta av «**kirkebokfører**», då kyrkjebokfører, og ikkje prest er behandlingsansvarleg for kyrkjebokføring.

Til kapittel 3 (§§ 15-26):

Askvoll sokneråd har ingen merknader, og støtter forslaget.

Til kapittel 4 (§§ 27-31):

Askvoll sokneråd har ingen merknader, og støtter forslaget.

Til kapittel 5 (§§ 32-44):

Til § 39 andre ledd.

Her vert føreslege eit nytt første punktum som ikkje er utgreidd. Endringar no i Bispemøtet sin funksjon og myndigheitsområde tilrår vi å utsetje. Dagens ordning sikrer den einskilde biskop sjølvstende i sine tenesteoppgåver, jf. også tredje ledd i samme paragraf i ordningsforslaget. Vi føreslær at første punktum i § 39 andre ledd i forslaget vert stroke:

~~Bispemøtet skal utøve tilsyn med og pastoralt lederskap i Den norske kirke, ivareta kirkens lære og teologi og fremme enhet i kirken og med andre kirker.~~

Til kapittel 6 (§§ 45-50):

Til § 47 andre ledd.

Forslaget som er sett fram for å kunne krevje medlemskap synest for snevert. Ikkje berre dei som har stillingar som inneheld ansvar for kyrkja si lære bør kunne krevjast medlemskap for. Vi føreslær ei justering og innskjerping her i forhold til forslaget:

Ved tilsetning i kirkelige stillinger som inneholder et ansvar for å oppfylle kirkens lære som er av betydning for å virkeliggjøre Den norske kirkes formål (jf. § 1), skal tilsettingsmyndigheten oppstille krav om medlemskap i Den norske kirke i tråd med adgangen til dette i lov 16. juni 2017 nr. 51 om likestilling og forbud mot diskriminering (likestillings- og diskrimineringsloven) § 9.

Biskopen kan gi dispensasjon fra plikten til å oppstille krav om medlemskap i Den norske kirke etter samme bestemmelse.

Til § 50 første ledd.

Endringsreguleringer i første ledd bør leggest inn i kapittel 1, slik at endringsreglene får samme endringsbeskyttelse som grunnlagsbestemmelsene i kapittel 1.

Askvoll 05.12.2018

For Askvoll sokneråd

Rune Ziener
kirkeverge